

Te hoê mau hiôraa no nià i te âmuiraa faaroo no Peniamina, i te motu no AHE MARU (Titema 1996-Tenuare 1997)

Ei ômuaraa, eita e nehenehe ia ôre ia faahiti te parau no te fariiraa poupou e te au maitai no te âmuiraa iti i te ùtuafare o te Orometua tei tae atu i reira no te faatere i te mau ohipa no te oraraa faaroo no te hopeà matahiti 1996 e te matahiti 1997 e te pureraa hopetoma.

Mauruuru rahi roa no te mau fariiraa. Ia haamaitai mai te Fatu i taua âmuiraa ra !

Te iôa no teie nei âmuiraa faaroo âpî

No te mea hoî, aita te iôa o teie nei âmuiraa i faahitihia e i haapapuhia i te mahana i haamauhia ai i te âvaè Atopa no te matahiti 1996, ua faaoti te orometua ia rave hia taua ôhipa ra i te tãpati 29 no Titema 1996 i roto i te taime no te pureraa avatea i te mea hoî, èere i te hoê ôhipa rahi roa. No reira, teie atu ra ia te iôa o teie nei âmuiraa faaroo maori rã o Peniamina, èere faahou rã o Ahe Maru. E iôa te reira no te motu.

Taua iôa ra, o Peniamina, tei maitihia e te mau mero o te âmuiraa iho, ia ìtehia ia i roto i te oraraa no te Tuhaa 6 e te Faatereraa atoà o te Etaretia.

Te faatiaraa i te hoê fare pure âpî

I roto i te hoê mau tauà parau raa e te mau mero no te âmuiraa, âpiti-atoà-hia mai e te Tavana iho no teie motu, ua hiti mai te hiaâiraa rahi no te faatià i te hoê fare haamoriraa i te mea, te mau pureraa, te ravehia nei ia i roto i te ùtuafare o te hoê taeàè iti e to na hoa (te utuafare no Matorai mā). E tià roa ia haamauruuru maitaihia no to râua pûpûraa mai te hoê tuhaa no to raua fare ei vâhi pureraa. Te fifi rã, no te vâhi ia, oia hoî ei fenua ia. No taua parau rã, ua matara mai te hoê manaò mai roto mai i te Tavana e tona iho hoa vahine, oia hoî, ahiri te vai rã to raua tuhaa fenua pãpû i AheMaru nei, e pupu mai raua no te âmuiraa. Aita rã hoî ! Teie rã, i te hoê mahana, ua tîpae aè te hoê taeàè o Cara tona iôa, mátau atoàhia o ia i AheMaru nei, e taeàè atoà hoî oia no Faura Afereti, tiàtono no Manihi. Teie te parau, e fenua to tona metua tane oia hoî o Timi, tiàtono metua no Manihi, ua faaturahia i teie nei. E tere rã e farerei ia na. Aita taua parau i faahaamarirauhia i te mea, i te mahana toru mahana matamua no Tenuare 1997, ia tere roa atu te orometua âpee hia atu oia e te tahi nau taeàè

no te amuiraa, i Manihi no te farerei tino roa i taua metua paãri rã ia Timi (80 tona matahiti) i roto i tona utuafare.

Teie te parau ôaòia i matara mai maori rã, e pûpû mai o ia i te hoê tuhaa o to na fenua i AheMaru nei no te Paroita. Aue ia parau maitai e !

Ua haamauruuru te Orometua i teie metua, na nià i te iôa no te âmuiraa, no teie nei horoà i ta na e nehenehe ai i te mau mero no te âmuiraa ia faaineine ia rãtou, no te mau taime i muri nei, no te faatiàraa i te fare pure.

E rave pãpû atoàhia te mau parau no taua horoàraa fenua ra i te pae no te Hau e te pae atoà no te faatereraa no te Etaretia ia ôre taua ohipa ra ia haapeàpeàhia.

Faaineineraa i te tahi nau tino

I te mea hoî e âmuiraa faaroo âpî roa teie tei haamauhia i te pae rii hopeà no te matahiti 1996 i mairi aè nei, mea maitai atoà, i roto i te hiôraa, ia faaineinehia hoê e aore ia e piti aè tino no te toroà tiàtono, e faanaho te hoê mau faaineineraa no taua tiàraa na roto i te faatereraa i te tahi mau haapiiraa tiàtono (mea maitai na te Orometua e haapao rã i teie mau tuhaa motu e faanaho i te reira tuhaa ôhipa).

Tiaî noa atu ai ia nahonaho mai taua ôhipa rã, te oraraa e te mau tereraa ôhipa no te faaroo i roto i te âmuiraa faaroo, te tere maitai noa rã ia te reira mā te tauturu atoà a te Orometua.

Te huru no te oraraa faaroo

Ia hiôhia, te vai ra te tahi mau hiaâiraa rû no te pae no te oraraa materia no teie âmuiraa faaroo maori rã, te paturaa i te hoê fare haamoriraa e te faaineineraa i te tahi mau aratai. Mea maitai atoà ia hiò i te pae no te oraraa varua. I teie mau taime, te tuhaa e ravehia nei no te faaâmuraa i te varua o te mau mero o te âmuiraa o te pureraa ia.

Ua haamauhia te pureraa avatea i te tapati mā te ôpere maitai te mau tuhaa na nià i te mau mero tataitahi.

No te mau tãpati ôroà, mea maitai re reira tuhaa ia haapaò maitai atoàhia, eiaha ia roa te area, hoê rã taime i te avaè, ia faatiàhia te oroà. No reira atoà terã manaò, ia faaineine rûhia te hoê aè aore ia e piti aè tino no te tiàraa tiàtono, ia nehenehe atoà ia horoàhia terã «mana» no te faatiàraa i te ôroà euphari.

Ua haamau atoàhia te pureraa fetii i te mau hopetoma atoà o ia i te mau pô mahana pae, e nehenehe atoà tãua pure-raa rã ia riro ei pureraa faraitè ôroà.

Ua ôpere atoàhia te mau tuhaa no te faatere i tauà pureraa na nià i te mau mero o te âmuiraa.

Te rahiraa o te mau mero o te âmuiraa e Etaretia ia. E utuafare hoê no roto mai i te fetii Tupana âpitihia mai ai te mau hunoà e ta ratou fetiirii tamarii. Faatata e, aita e taata ê atu. Taaè noa atu ai vêtahi mau taime te tahi mau tino no Tahiti tei haere mai e ôhipa i AheMaru nei na roto i te parau no te faaapuraa poe parau, o te âmui atoà mai i te pureraa e taè noa atu te tahi nau tino poro Evaneria no Faa tei faaea atoà mai i AheMaru no te ôhipa parau. Mea atea rã to raua faaeearaa !

Ei faaotiraa i teie nei mau hiôraa, na parau rû e tano e hiôhia, te faaineineraa i te tahi mau aratai no teie nei âmuiraa e te faatiàraa i te fare pure. No te tauturu atoà i teie nei âmuiraa, ia faatae pãpûhia te mau veà porotetani o te matara i teie nei i te mau avaè atoà. Na reira atoà te parau no te orometua e haapaò rã i te tuhaa no Takapoto, Takarua, Manihi e AheMaru, ia tupu te tere farerei i teie mau motu hoê aè taime i te avaè no te faatupu tamauraa i te tuâtiraa i rotopû i teie mau motu, no te mea, te vai ra te hiaâiraa rahi mai teie e ìtehia nei i AheMaru nei no te tino orometua. Ia faaitoito atoà rã te âmuiraa i te tiaturiraa i to iho puai i te mau taime aita e orometua. I roto i te mau tere no te mau orometua no roto mai i te mau ôroà rarahi mai te ôroà no te hopetoma moà, te Faraire poheraa, te ôroà pata, te ôroà Penetetote, te ôroà mē e te mau ôroà no te hopeà matahiti.

Eita e ôre, e huru ohie rii te tere i nià i te motu no AheMaru i te taime e oti mai ai te tahua tauraa manu o te âvarihia i te mau taime i muri nei.

Terã rii te mau parau e nehenehe e faahitihia i muri aè i te tere no te orometua i nià i teie motu no AheMaru, te ìte atoàraa te oraraa hau o te taata, te heeuri o te fenua e te âhune o te moana na roto i te mau faufaa e rave rau.

Mauruuru maitai ā e to te âmuiraa e a faaitoito i roto i te tavini raa, ia tauturu mai te Fatu ia outou e ia tatou paatoà. Ia maitai i te roaraa no teie matahiti âpi 1997.

Gaston Tauriao